

REGIONAL NEWS BULLETIN

HEADLINES (MORNING)

- 1. Kumin kum tir atanga March ni 31 inkarah Mizoram Police chuan thubuai hrang hrang case 484 a ziaak lut tawh.
- 2. Ram pum huapa eitur tha ei tura inzirtima Poshan Pakhwada chu kar 2 chhung, tun thla April ni 9 atanga neih a nih hnuah nimin khan khar a ni.
- 3. West Bengal Assembly inthlan thawhkhataaah vote zaa 92 leh Tamil Nadu Assembly inthlanah vote zaa 85 a tla
- 4. External Affairs Minister Dr.S.Jaishankara chuan India leh Africa thawhdunna chu tunlai khawvel politics dinhmun thlirin a pawimawh zual a ti.

<><><>

CRIME REVIEW MEETING

Kumin kum tir atanga March ni 31 inkarah Mizoram Police chuan thubuai hrang hrang case 484 a ziaak lut tawh.

Nimina DGP Conference Hall, PHQ-a Crime Review Meeting-a tarlan danin kuminah case 484 ziahluh niin heng zinga 261 chu chhui chhuah a ni a, nikum 2025 ah case 3254 ziah luh niin case 2449 chhui chhuah a ni bawk.

Crime Review Meeting ah hian DGP Sharad Agarwal chuan Police te chu case chhuichhuah kawnga tan la zual tur leh tunlai thiamna hmang tangkai turin a chah a, Digital Portal hrang hrang te pawh tun aia hmang tangkai thiam turin a chah bawk. DGP chuan ruihhlo tawlh thinte man chhuah kawnga police duty te pui thei tur Nexus Application pawh duan mek a nih thu leh hun rei lo teah hman tan tum a nih thu a sawi bawk.

"State Action Plan (2026-2029) to Combat Drugs Menace" pawh sawiho niin, India ram, ruihhlo awm lohna ram a lo nih theihna tura hmalaknaah Mizoram chu a ti tha ber ni thei tura theitawp chhuah turin a chah bawk a ni.

(Desk)

<><><>

SCHOOL EDUCATION MINISTER

Nimin khan School Education Minister Dr Vanlalhlana hovin a pisa-ah School Education Department hnuuia State Level Anti-Drugs Committee neih a ni a, ruihhlo laka school naupangte fihlim theih nana hmalak dan tur rel a ni.

Thutkhawmah hian ruihhlovin school naupangte a tihbuai dan chungchang zir chianna awm tawhte thlir ho niin ruahmanna siam a ni a. Hmalakna atan School Drug Policy buaipui turin Drafting Committee din a ni.

Ruihhlo laka fihlim lo zirtirtute lakah na taka hma lak a nih tur thu leh school leh a chheh vela ruihhlo ti leh zuarte dim dawi an nih loh tur thu sawi ho a ni a. Ruihhlo leh a kaihnawih natna avanga Mizoram hming mawi lo thin chu zirna hmanga siam that dan tur leh, sawrkar, khawtlang, kohhran leh chungkua tan ho dan tur ngaihtuah ho a ni. Department hrang hrang, Health & Family Welfare , Social Welfare & Tribal Affairs leh Excise & Narcotics te nen ruihhlo do kawnga thawh ho dan tur rel a ni bawk.

Thutkhawmah hian School Education Department, Mizoram Social Defence & Rehabilitation Board, Social Welfare & Tribal Affairs, Excise & Narcotics Department hotute leh Mizoram Teachers Federation hruaitute an tel a ni.

(DIPR)

<><><>

POSHAN PAKHWADA

Ram pum huapa eitur tha ei tura inzirtima Poshan Pakhwada chu kar 2 chhung, tun thla April ni 9 atanga neih a nih hnuah nimin khan khar a ni.

Poshan Pakhwada hi Women and Child Development Deparment te chuan Anganwadi Centre tinah programe chi hrang hrang nen an kalpui a, naupang leh nuten an hlawkpuiin an hlimpui hle ni a thudawn a ni a. Naupangte an hriatna kaihtawh kawngah te zirtirna pek an ni a, cooking competition te an nei a, phone, computer leh TV hma a

hun hman tlem thatna an inzirtir a, naupang nungchang leh rilru zirchianna te, video clip hmanga awareness pek chhuah te leh tlan (Nutri Run) te leh thil dang dang huaihawt a ni.

Mizorama Anganwadi Centre te chuan Poshan Pakhwada hi an hmang tha hle a, centre, block, district leh state level ah theihtawpin tan lak a ni bawk.

Byte

(Corr : Maremi)

<><><>

GOVERNOR

Cooperation Department, National Bank for Agriculture and Rural Development (NABARD) leh Mizoram Cooperative Apex Bank Ltd., hotuten nimin khan Larsap, General (Retd) Vijay Kumar Singh chu Lok Bhavanah hmuin, tunhnaia "Scheduled Bank" dinhmuna Mizoram Cooperative Apex Bank hlankai anih chungchang bakah hmalakna dange an sawipui.

Larsap chuan Mizoram Cooperative Apex Bank Ltd chu scheduled bank an nih tawh avangin State Sawrkar hnuiaia department-te pawhin dan ang taka an dawr theih tawh dawn thu a sawi a. Cooperative Bank-te chu mipui nawlpui tana dawr theih an nih avangin tun aia hmasawn leh zual tura theihtawp chhuah turin a chah a ni.

Mizoram chuan Banking sector-ah bung thar kaiin tunhnaiah Mizoram Cooperative Apex Bank Ltd. chuan 'Scheduled Bank' status a hmu thar a. Gazette of India, April ni 15-a tarlan a nih danin Mizoram Cooperative Apex Bank Ltd. chu Second Schedule of Reserve Bank of India Act, 1934 ah telh a ni dawn ta a ni.

Mizoram Cooperative Apex Bank Ltd. hi July 31, 1982 khan din a ni a. Tun dinhmuna Apex Bank hian branch 35 leh ATM 45 a nei mek a. Deposit cheng vaibelchhe 1930 neiin, loan cheng vaibelchhe 1272 an pe chhuak a, sum dahluh leh loan pek chhuah khaikhinna Credit-Deposit (CD) ratio hi zaa 66 a ni a, Mizorama Bank-te zinga loan pe chhuak tha berte zinga mi a ni mek a ni.

(DIPR)

<><><>

PHAISEN POLICE

Phaisen Police Checkgate-a Duty-ten nimin khan Checkgate paltlang tum lirthei pakhat atangin Iconic White Whisky litre 198 leh Kingfisher Beer litre 408 an man.

Zu phurtu Fokrul Islam Laskar (kum 20) leh Ansar Uddin Laskar (kum 19) Assam Cachar District mi ve ve ni-a insawi chu an man nghal a, Vairengte Police Station-ah thubuai an ziak lut a ni.

Phaisen Police-in zu an man hi printed price angin Rs. 1,97,760 hu a ni.

(Andrew Vanlalauva PTC Kolasib)

<><><>

ZMC

Zoram Medical College & Hospital (ZMC&H), Falkawn chuan nimin khan thluak lam natna chi khat, World Autism Month an hmang.

Autism ah chuan naupang thanglai in ze danglam tak an neih thin aa, nimina ZMC&H-a World Autism Month hmannaah hian Pediatrics Department-a HOD Prof. F. Elizabeth Lalhmangaih zuali chuan kumin atana World Autism Month thupui 'Autism and Humanity - every life has a value' tih a sawifiah a, Psychiatry Dept. HOD Dr Lalhriatpuia leh Dr Cindy Lalramchuan ten Autism lanchhuah dan te, khawvel leh Mizorama a hluar tawh dan te, harsatna a ken tel theih te, hriatchhuah a nih theih dante leh hriatchhuah hma a pawimawh ziate an sawi a. Hei bakah hian enkawl dan kalhmang hrang hrangte sawi hovin, enkawl hma in kawng ro a sut zia te sawi lan a ni bawk.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

BOOK OF THE YEAR

Mizo Thu leh Hla Inpui (Mizo Academy of Letters) chuan an pawl din champha lawmna nimina Aizawla an hmannah 'Kham leh Suar' thawnthu ziaktu Pu Lalrammawia Ngente hnenah Book of the Year 2025 chawimawina thu ziak leh pawisa fai Rs 10000 a hlan.

He hun hi Art & Cultur Director Pi Carol VLMS. Dawngkimi'n a hmanpui a, Dr. Darchuailova Renthlei, Dr. H. Laldinmawia leh Tv Lalrinnggheta te leh khabu a tlangzarh nghal bawk a ni.

MAL in Book of the Year 2025 a hlan chhan thuziakah chuan “He lehkhahu hian mihring nun chhungril khawharna leh hmun hlauhawm tak tak a hai lang a, khawtlang nun inthlak meka sual ngaihzamnain nun a tihchhiat dan te, Pathian hmangaihna leh beiseina nungin sual thûk taka tlu tawh pawh a tuam dam theih zia te thiam takin a tar lang tih a ni.

(DIPR)

<><><>

ELECTION

West Bengal Assembly inthlan thawhkhataah vote zaa 92 leh Tamil Nadu Assembly inthlanah vote zaa 85 a tla a. Inthlan neih tawha vote tlak that ber tum a ni bawk.

West Bengal ah hian inthlan thawhkhataah Assembly bial 152 ah vote thlak a ni a. Candidate hi 1478 awmin an zingah hian hmeichhia 167 an awm a. Polling Stations 44376 siam a ni a. Heng zinga 5600 hi hmeichhiate chauhin an enkawl Polling station a ni.

Tamil Nadu-ah chuan assembly bial 234 ah vote thlak a ni a. Polling station 75065 awmin Voter vaibelchhe 5 nuai 73 sing li sang 3 leh 291 ten thawhkhata neih turah an aiawh roreltu an thlang a ni.

Heng state pahnih inthlan vote tla te hi thlaleh May ni 4 hian Assam,Keralam leh Poducherry te nen a ruala chhiar a ni ang.

(Newsonair)

<><><>

EAM

External Affairs Minister Dr.S.Jaishankara chuan India leh Africa thawhdunna chu tunlai khawvel politics dinhmun thlirin a pawimawh zual a ti. Nimina India Africa Forum Summit logo,theme leh website a hawnaah he thu hi sawiin Pu Jaishankar-a chuan Africa chuan India foreign policy ah dinhmun pawimawh tak a luah thu sawiin tunhnaiah Africa ramah India a che nasa hle a ti bawk. India Africa Forum Summit hi thlaleh May ni 28 atanga ni 31 chung neih tur a ni a. Pu Jaishankar-a sawidanin Africa khawmualpuiah hian diplomatic Mission 17 hawn thar a ni a ti a. Heti hian India in Africa-a diplomatic Mission a neih mek zat chu 46 a tling tawh a ti bawk.

(Newsonair)

<><><>